

四庫全書

集部

欽定四庫全書

集部

石倉歷代詩選卷四百七十五

詳校官右中允_臣薩敏

侍讀_臣孫球覆勘

總校官進士_臣朱鈐

校對官中書_臣李荃

謄錄監生_臣俞鳳

欽定四庫全書

石倉歷代詩選卷四百七十四

明 曹學佺 編

明詩次集一百八

王韋

懷師文

幽薊多北風塵埃旦暮起嚴冬十二月積雪亘千里落
落高樹摧靡靡勁草死中夜獨徬徨念我同懷子遙遙

涉玄冰單單渡易水歲暮人閑關何為遠遊此

三月晦日送龍致仁南歸

今日城南路楊花已不飛夢隨家共遠春與客同歸酒
氣薰杯淺碁聲隔院微韶華如別意猶自戀餘暉

問柳

為問故園柳春光幾許深未忘攀折處猶帶別離心疎
雨一川暝輕煙兩岸沈主人歸未得惆悵五株吟

與陳宗虞夜坐

不知秋已晚忽見菊花叢獨坐閒亭上相期細雨中燭
融蘭燄紫杯泛杏膏紅未聽歌鐘罷蕭然動北風

遊梅岡和石亭韻

將軍埋甲處登望一凄然江映杯光動嵐消劍氣懸郊
垌摧草樹時序變風煙惟有翻經閣還開落照邊

和韻送邊華泉進表北行

夜泊龍江上孤舟寒未開月從京口沒潮自海門迴
喜朋簪合終妨宦轍催幽燕與河汴深負十年杯

永寧道中

征馬且徐徐青山畫不如川原古貌外風俗上皇餘行
旅多杯飲編民半穴居此中有美酒誰更說華胥

和翟仲鳴

翛然一榻愧端居未許駑駘駕鼓車勝事都歸鄉夢裏
幽懷更在客愁餘別離門戶從秋掩契闊樽罍盡日虛
寄語多情翟廷尉莫將交態向人書

新嘉驛遇顧九和

下馬郵亭若有期南還北去各淒其殷勤野老來相饋
邂逅壺漿坐不辭雪滿郊園埋宿草風吹林麓墮寒枝
十年離索驚回首却恨逢君是路岐

李雲卿宅薔薇

柔香弱蔓不勝寒十二圍屏錦繡攢秦殿曉粧俱窈窕
習家春事未闌珊憐將清奏愁中聽競折高枝醉後看
好待詩成酬勝賞東風休遣露華乾

冶城山鈎韻

仙羽翩翩鶴共騰
冶城高處望金陵
涼颼振袂鳴蒼珮
霽色當樓耿玉繩
浩渺波濤秋可濯
清虛臺殿夜堪憑
風流況對詞林客
莫厭尊前酒似澠

春盡日

滿院楊花雨後稀
綠陰清晝思依依
小園風暖櫻桃熟
曲岸泥融燕子飛
北闕明時開王氣
南山青處藹晴暉
眼前風景皆堪賞
莫道韶光夜已歸

詠銅雀研謝衛南

千年瓊甃竟誰留
北苑西坑未可酬
麗藻刻文傳魏代
紫苔生潤出漳流
歌聲已散宮牆廢
霸業都忘翰墨收
慎勿濡毫吟總帳
恐教羅綺結春愁

與衛南英玉圍爐

圍爐曾共訂幽期
底事今年寒較遲
却喜草堂初雪後
更逢梅樹欲花時
鐘聲遠度啼烏壘
燈影頻驚凍雀枝
細茗清薰供樂事
短吟長咏勝彈絲

聖駕傳聞幸榆林

玉轡偏禁塞馬驕武皇身試漢嫖姚事傳栢谷知非久
路入榆關恐更遙賴有典章垂宇宙愧無忠悃達雲霄
春來莫厭貂裘重積雪燕山尚未消

落花

春園啼鳥報花開為憶當年手自栽對月一樽初賞罷
近風千點却飛來閒情夜夜悲銀管鬢髮朝朝墜鏡臺
最是東皇堪恨處滿庭疎雨濕蒼苔

望登封

晚空斜日下三川千里風光客思牽
漠漠天垂秦徼外依依人去嶽峰邊
河淙亂石侵官道沙擁荒藜被野田
聞道登封非盛節莫將遺事問當年

除夜

遠宦携家任路岐夷山猶未是天涯
愁中抱病還增劇客裏逢春不自知
好記流年收栢葉乍消殘雪見梅枝
朝來百歲過強半惆悵穠華負盛時

新春試筆

宦情離思近何如
半夜青陽到敝廬
鵲噪漫傳新歲事
雁歸應帶去年書
乍開簾幕知寒退
賸得風煙愜閨餘
一樹杏花猶未發
欲嘗春甕更躊躇

寄邵士廉

柱史歸來陋巷居
菜羹蔬食十年餘
不知身有衣冠在
肯信家無擔石儲
燈下獨看徐孺傳
庭前常晒鄴侯書
多君苦節無能薦
尚挹風流為起予

元夕

笙歌猶記昔年曾爛熳風光不自勝
珠海月輪翻夜水
碧空星皎漾春冰香芬巷陌金輿度
花壓樓臺翠袖凭
此夕曹騰杯酒熟短檠還對讀書燈

和靜齋憲長登上方塔

沈寒高處萬緣空躡盡丹梯更幾重
鈴語乍聞清晝寂
香煙偏近紫霄濃上方未徹鈞天樂
下界仍傳薄暮鐘
咳唾隨風無着處杳然飛墜五陵松

送顧華玉謫全州

踟躕溪上暫停驂欲話離言不可攀
世事日惟添白髮
官情時復夢青山
乍寒燕谷鶯無語
細雨湘江竹有斑
此去西堂春至後
擬開樽酒待君還

寄題劉東之園池

柱史園池萬竹斜
小羅山下岸烏紗
晚畦刈罷還抽葉
秋徑歸來未着花
不用平泉繁草樹
誰言蓬海賸煙霞
平生賦咏多休暇
更種東陵十畝瓜

春草

帶雨和煙未可名春風處處不勝情于今南浦知多少
都向王孫去後生

柳枝詞

渭水西來萬里遙行人歸去水迢迢垂楊不繫離情住
只送飛花過渭橋

田登

號偶山
長安人

古怨行

結髮誓同死如彼秋月娟倏忽二八夜輪虧光亦偏君

心初豈異歲月情隨遷我心諒非席易直不可卷今適
逢彼怒恩情中道捐淺深徒方泳匍匐亦枉然獨持向
月心欽欽望復弦式微塞上草露晞霜稔沾自分適脆
薄安能懟彼天綠鬢埋青銅猶自恃華鈿

二

青樓萃妓女朱箔垂紅袖凝粧鎮日間絃管留清晝千
金少年子雕鞍駝紫繡一閱兩情歡不止成虛覲星河
誓死生魚水擬綢繆如何塞上郎分恩有新舊十年邈

音書闕車脫輻輳郎心露下柳妾心蓮中藕柳兮露易
晞藕兮思長久更餘孔孔懷抽葉和露守

三

寒折伴秋砧殘星迫明滅陟階哀廣埏回飈迅枯札銅
龍玉漏沈籌箭遙更掣良人祇皇役驅駕河梁雪期逝
胡不歸多恤心如結飛鴻悵冀瞻蘭光照孤孑鬱我獨
處心一日成三月近聞王事殷敵兵來倉猝烽火戍煙
紅于征歲三越靡監臣子心勉旃事征伐捷書報承明

妾心死亦歇

四

陟彼古城闌采采水中蒲所懷逾云遠各在天一途憶
昔結髮時情深魚水娛曲折值驚濤分流異江湖賸言
始終心擬彼文竹軀抱竹坐永宵愁心倚寒襦冰霜耐
歲寒雲雨巫峽孤癯軀良可捐天恩豈容辛勤節抱虛
心望望凝蒼梧

五

幽衾當永夕蘭膏燭不揚撫茲夙夕心迂我九迴腸聞
門值暝夜皎皎星河光林杪下悲風偃草棲寒霜昔為
比翼鳥雙雙水中央今為失羣鴻分飛鬱未翔志願豈
容謬會遇不能忘君有萬里行妾無百歲長流光過奔
雷春草秋復黃人生在契合沈溺豈云望臨淵羨魴鯉
徜徉得真常

有感

南山高崖我澗水深滄漭山高薪可炊水深汲可養人

心咫尺間非高亦非廣
倏喜會雨雲倏嗔生魍魎
尚可被人心更安想

冬夜

首冬雪初霽寒月揚素波
仰視參星臨皎皎浸長河
欸漏咽深更蘭膏影婆娑
暝坐謝煩囂素心敞寥廓
大化浪形骸寄寓能幾何
願言保真原無令委塵莎

自叙

人事殊好乖造化亦忌全
偶爾適京邑網羅三十年一

朝擲簪絃罩魚歸故淵桑麻足織絰糜黍聊粥饘南山
儼在望幽然悟太玄日夕抱倦歸兒女羅燈前我觀星
河靈我夢神慮堅寤言一室清性命復其天人生苦不
再康遂亦幸然

昭君怨

漢臘殊未暖胡沙不苦人
羶車旌悠悠繫我昭陽顰
八歲入深宮消系感君仁
一朝賜出塞詔罷羽林軍
妾去六軍逸况復天王欣
獵獵北風寒吹我髻上塵
紆于姜

白草日夕天黃雲塞鳥間關鳴鳩花寂寞春造化無脆
腴寔命有遘迤單于近款塞無念妾身淪

郊居

晴宇肅秋容林垆歛綺縠橫砥激迅湍迴鷺沓輕雪密
茂凝坐痕遠岑當垣缺纍纍懸朱實飄飄醉丹蘂駭矚化
理駛寄傲塵紛絕廣庭敞中央款我素心傑盤殮剪園
蔬倒飲壺觴竭爛石歌漫霄采薇抱孤節欽法君子行
貞固丈人烈遐颺越塊壤挹清避污蟻願結歲寒盟避

近成真說

夜起對月

良宵耿不寐皓魄爛華堦夜氣湛以肅良理復其天神
魚戢比鱗揚鬣逝故淵倦鳥惜翮翮瞻巢憤翮蹀物性
豈鑿意生遂悉其然饒饒千金子堂垂竈突煙狎客坐
羽觴鼓吹滋華年一朝廷比隣捐崩更播遷執守宜中
人况復非聖賢如有汶上召為我謝迂愆

畫竹

何人移化工亭亭寫修竹高岸展阨塞洎流帶滄泱節
撼首陽山風吟淇水隩冰霜歲寒深雨露湘江逐朝陽
儀鳳毛笙鏞滿山谷

雲溪驛

隴樹蒼翠凝堰水清且淪烏鵲巢南枝牛羊下日落春
怡花神交道泰隱者作所志高遐心安用生怡樂

石上松

偃蹇石上松年齡頃而邁霜老青銅顏春茁翠羽蓋巢

鶴締心盟藤蘿仰風介去去赤紅崖朝堂梁棟派

感興

老生縱長談至理良不外人謀寓經權天機隱成敗智者俯時艱賢人期道泰共持松柏操雅與歲寒會

述懷

蕭蕭鳴秋林皎皎流天漢啾啾蛩音哀熒熒燭光燦綿蔓抱所思憂耿夜將旦我寒非無衣我飢非無粢惟彼宇宙間飢寒何瀾漫誰捐篋中藏不息常滋灌緬言不

可得寥寥坐長歎

同年安彥臣黃門水心亭

塗方山岷嶴泝江滄
濟達人縱大觀
疏鑿成俯仰
茅茨結中間
源泉派分黨
環柱斗棲簷
連楹礎躍蹠
月牖開通明
風簾障虛敞
瀑布淙錚鳴
水鏡浸淫滉
博岸繚郭廓
修竹排箕蕩
馴鳥呼友朋
遊魚忘罟網
怪石歌無名
薦花秀而爽
萬綠茁春顏
霜紅振秋響
未擬三台公
試作一亭長
黃卷擬聖賢
大義發深想
體驗重身心
弘

深事咨訪經綸發機杼扁鑰歸指掌所以君子心未達
窮先養君今養已充世紛適魍魎願酌水心清談笑浥
塵壤

芳蘭行

猗彼芳蘭菁朝發水中沚郁郁揚素芳被漸無終已藻
麗星日光驛達風雨駛餘英並流澌灌汲澤千里苞芬
羣蘂修獨秀森復歸龍箴良未珍鳳姜詎能倚春吹起
幽沈國香泛簋簋

龍潭行為憚公子作

禹門空濶春雲結三山孤起天門裂懸河中傾驚浪奔
蜿蜒聞吼雷霆掣蛟龍鱗角久崢嶸飛出蒼溟解九紕
好從霖雨惠蒼生長嘯清風商旱絕

經綸行送沈方伯之雲南

仙舟款棹湘江濱中有真人衍經綸縷分類比坐機杼
舜裳殷嘒周郁文彀中葉葉廣糾紛桑麻布屨及玄纁
更憑餘緒繫諸蠻坐使羶毳仰聖君

楊妃春睡圖

長生殿屬春殘後春風亂拂宮門柳花奴念奴競霓裳
君王醉飲玉環酒梨花帶雨壓薔薇雲鬟不整倚羅幃
玉容懨懨點猩唇香魂漫逐蝴蝶飛落花飛絮總不綰
鬢欹釵嬾梳半偃蛾眉春困苦不勝翠袖頻翻拂杏臉
流鶯啼破夢初回報道君王來玉輦君道海棠花睡熟
玉笋纖長抱凝玉和來玉屑仙盤露渴心奈夢含花鹿
黃陵廟和宋歐陽韻

曉泊夷陵舟停橈問楚俗
又牙石露鋒葱蒼巖放木棹
歌漁唱隔江聞江嶺差我廟有神草遮迴磴峰迴路過
者乞靈自來去憶昔佐禹立神功世代相傳碑有故高
峰俯瞰兒孫嶂舉頭惟有天在上一水奔雷綠遶春兩
山刺天青入望巔崖遺跡似金牛世牛不全空令愁登
高長嘯暮山隱風雨瀟瀟江上舟

殘春午坐

日午塵喧息天光入望清
飛花過鳥逐垂柳躍魚驚
雨

盡溪聲歇雲開山翠橫殘春心不展腸斷數聲鶯

半山寺

古殿隱山隈松花老碧苔暖風吹凍去飛雨過山來一
榻午猶睡雙扉閒不開野禪無甲子燒篆卜春回

靈石道中

靈石通汾水晴春陟遠山崑空漁歎乃風靜鳥綿蠻官
府征絲省農家歲月閒十年頻過此吁我鬢毛斑

遊曲江

雪霽山門出雲空塔影遙煙花韋杜曲踪跡漢唐朝碑
跌橫蝸殼江痕伴野燒夕陽歸路晚明月迫春霄

元宵

天炯夜光寒昇平萬姓歡火雲流貝闕紅雨下層巒夜
騎遊潘岳春衫舞阿蠻香車金犢過沈醉夜更闌

曉春

淑氣催冰泮晴光着柳絲草青前夜雨花發去年枝日
暖鶯聲啞風酣燕影遲子臣當道泰寸草報春私

巢林和尚

披衲投金地談空湛遠心生涯翻貝葉踪跡寄巢禽
法鼓喧朝夢曇花雨夜吟幾因觀色相物物自蕭森

遊仰天寺

上方天日近下界水風幽泉合千山脉蟬空四壁秋
僧牀林影黑佛頂電光流相對渾疑夢浮生一過舟

衛輝道中

黃土岡頭路炎蒸勢欲焚樵枰秋礪石牧笛比干墳
野

潤蟬鳴樹天空山吐雲故人樽酒別悵望午風薰

彭幸菴尚書致政

息駕秋風興閒身未老年
宦情風掃葉心事日行天
魏闕風陰暮秦山花鳥妍
行藏如有論屈指道公全

楊遂菴先生致政

雲物動高秋離亭注別愁
世紛憑塞馬心迹寄江鷗
雷雨明周旦溪山待許由
相看風浪急獨喜上扁舟

春遊

曲曲沿芳逕紛紛點落花鶯聲隨遠岫雁影落平沙薰
入遊人醉青歸去鳥賒傷春回遠眺落日暮山斜

黃鶴樓

飛閣枕江皋仙人跨海鼇潮回留岫濶雲去見天高春
色看晴樹秋風鼓夜濤登臨開遠眺長嘯五陵豪

岳陽樓

渺渺洞庭波君山翠擁螺江空含月小地剩得天多寒
色征鴻陣秋風返棹歌湘靈不可問落日下煙莎

宿魚山

魚山留晚棹寂寞坐更深
暗浪喧舟腹寒燈映水心
顏風墮墨淚高調憶鍾琴
江樹識人思蕭蕭寄遠吟

九峰寺

雲樹擁山頭林聲襍亂流
篆沈僧晝寂門掩佛燈幽
殘黛花驚雨高吟蟬訴秋
登臨橫遠望身世擬輕鷗

臨湘道中

望遠塵襟潤林深去馬遲
雨喧春圃綠風動曉山吹
鼓

浪魚驚餌拖聲蟬過枝山靈如有意花鳥慰春思

蒲圻道中

積雨湘江暗林深雲滿蓑蒼山奔夜澗老樹引春羅白
雪紛鷗鷺青錢點菱荷客心歸未遂腸斷楚山莎

咸寧道中

南望山陂驛山連草樹幽水雲浮幻象煙雨結春愁花
綻猩唇血泉分燕尾流午薰民愠解蠶老麥花秋

遊玉泉寺

秋日玉泉寺水喧山腹深石泉噴白雪巖樹插青簪
幻合煙花夢淒飛風葉吟喧囂共幽寂無復解鍾琴

華容道中

秋樹千林合幽塘一徑通雲開山秀近萍落水天空
鳥下蒼煙食人眠翠竹宮閭民隱切愁苦望春風

九谿山行

躡屩躋天庭旅車逐井陘鶴巢雲竇白竹引石泉清
潭黑蛟方蟄峰高猿亦驚亭亭山木拱野老不知名

歸州峽

城堞勢凌空江流百折東雲蒸神女峽春沁楚王宮民
屋高低見山花寂寞紅夜深奔浪惡風雨撼蒼穹

巴風

山腰盤複道高下住人家物色冬青樹時新穀雨茶楓
團凝遠蓋泉落綴驚蛇記得旋舟日東風桃李花

遠安山行

荆門復西下山僻水聲幽民屋雲中結泉聲石上流農

桑春不擾雞犬夜忘憂却憶觀風日庚辰歲暮秋

晚馳應城

午發劉家隔黃昏入應城暮煙漁火暗秋色野帆輕雁
陣西風夜星纏南浦晴遠心簪冕掛擾擾負平生

和薛君采王政功德寺韻

飛錫超三昧談空寂萬緣祥雲停祇樹法雨暗諸天化
鶴春巢翠降龍夜咽泉刳塵歸幻夢功德兩惓然

少年行

曉色繁華動微風燕子忙萬錢無下箸百妓有專房絃
管春聲細樓臺秋夜長星沈更漏徹猶逐夢魂香

過隱者庄

幽軒停白晝心古萬緣輕春壑花爭放澄潭浪不生雲
山當近戶風雨望高城歸去淵明社欣欣木正榮

楊希仁起復總兵官

胡馬橫霜塞彤庭詔翦頗重領新斧鉞迅掃舊山河細
柳將軍今天山壯士歌龍城降處劍休帶血痕多

劉孔林賓相餞別

款酌延長夏論交重遠心雲開青嶂晚鳥下綠蕪沈內
苑紅粧妓南薰綠綺琴夜涼更秉燭一任主情深

秋夜納涼

暑退蟬鳴秋氣清傍簷枯坐旅愁并香沈夜榻疎燈暗
雲捲晴空孤月明覆載敢忘犬馬報江山終結鷺鷥盟
天涯此日還為客後夜清光何虛盈

次涇畢渡小憩山寺

霏霏煙雨促寒旌
野寺柴關暫息征
石洞坐苔僧補衲
滄浪竚馬客湔纓
洎洎瀑布分空翠
寂寂歸鴻喚晚晴
更上高原回首望
癡雲宿霧兩山平

次安定

星槎渺渺逐行雲
騷客情悰入雁羣
寒日人過天水郡
高原秋老隗囂墳
民居土穴冬應暖
秋墾青山晝正勤
風俗淳龐猶太古
莫教全璞易深文

次潛麻灣

縈紆鳥道上潛麻白草黃雲映曉霞一節中郎還朔漠
千年柱史度流沙雉飛東勝隨秋燒梅落西風倚暮笳
彈鋏壯心期未遂數聲長嘯雁行斜

次紅城

同雲積雪伴寒征遙捧綸音絕漠行萬里關梁催曉夢
殘更鼓角壯秋聲芻糧起伏依山寨兵衛森嚴入夜城
拭盡征袍塵土夢夜深霜冷月華明

邊夜

紅塵無日憩奔忙，萬里河梁客思長。
鬼哭空濠秦將士，碑沈衰草漢文章。
民諳風土遵王度，天簡河山壯帝疆。
吟罷晚鐘清夜永，疎林月影浸寒霜。

入朝

舜庭鸞鳳儀皋契，薰入南風奏管絃。
宮殿雨晴高燕雀，冠裳春暖去貂蟬。
長安抱鼓思張敞，江國登樓憶仲宣。
願祝遐昌神祚永，無窮春色下堯天。

感中原

時流賊大肆剽略

中原遙望暮雲連，殺氣沈沈恨滿天。
野老裹瘢埋戰骨，佳人投淚濕華鈿。
莊園燒盡餘丘土，桑柘荒殘宿野煙。
吏畏官軍頻駐劄，夜深橫索里人錢。

報國寺和張子醇同年韻

興滿禪林坐日長，漫拈吟筆寫山房。
草含梅雨傳新綠，人醉松風話晚涼。
碧篆歟飛僧晝靜，紅塵空逐宦心忙。
百年莫惜杯中物，岐路令人易斷腸。

遊西山寺再用前韻

水僻山深路轉長
攀蘿沿磴到僧房
危橋石抱村流急
古殿鶴巢岩樹涼
百計巧思蠶更拙
片時春夢蟻空忙
憑君莫動登樓思
故國山河易斷腸

瞻華山

巨靈危峭峙金天
俯瞰羣山脉脉連
東岱北恒分保障
秦皇漢武歷封禪
金城秀遶三峰翠
玉井花開十丈蓮
盛世褒封應有自
願教靈異產多賢

元宵

太平文物重春宵
駕海黿山萬燭
燒絕壁火雲光爛熳
交花玉樹影飄飄
朱門豪氣橫金馬
繡幕春風浮玉翹
鼓角高寒明月午
暗塵風靜夜天遙

春日即事

斜風細雨入林深
寄傲南窗對遠岑
花放曉風紅作陣
柳翻春水綠成陰
酒因地僻難成醉
天為詩豪賸賞心
梅子傳黃桑柘綠
困人天氣思沈沈

殘春即事

晚春斜日草堂暄車馬稀遲獨掩門彭澤柳遮元亮宅
東山花發謝安墩經談往事心惟舊客話浮生酒在樽
獨坐寒齋風雨夕鳥啼花落又黃昏

夏日午坐

午風驅暑晝庭涼古木陰陰夏日長
蘭館雪紛千縷白
麥疇雲散一川黃
夜光暗遶青藜杖
吟筆晴看古錦囊
高卧北山堅不起
莫教猿鶴怨山芳

吉道行出知莘野

飄渺雲山接素秋
除書今喜牧樊州
看碑口炙思羊祐
駐馬心誠拜武侯
霜月夜懸鄉國夢
春風晴散井閭愁
莫言棘枳成幽獨
寄取梧桐引鳳遊

約胡重器王子章陳大用三僚長遊城北寺

鑣聯曉色入空林
殿閣林沈草樹陰
雲壑老禪歸晝寂
石林高鳥自春吟
旛旌渺渺塵寰隔
風雨蕭蕭法相深
片日浮生真幻夢
渾忘身世有華簪

秋日赴友人飲

臨軒高宴雨初收一葉梧桐萬境秋
鳥帶夕陽歸草樹雁拖寒色下滄洲
詩賡瓊玖人依竹酒泛歌鐘風滿樓
玉宇高寒心更切江湖廊廟總關愁

冬日友人携酒至留飲

野人携酒過山城溪藪林叢醉瓦甌
霜樹蕭蕭枯葉戰雲川漠漠暮煙征
興來杖履尋丹壑老去詩篇伴短檠
從此不知人事改欄花庭草任枯榮

慈恩寺弔古

慈恩塔畔曲江路坐想人文盛集時
斷碣秋深苔長綠
廢園春老樹無枝
三川禾黍王侯第
四壁龍蛇今古詩
惟有南山渾似舊
數峰青影自參差

遊仰天寺

梵宮金碧隱山隈
古殿深沈老碧苔
萬顆珠璣巖溜下
一庭羅綺檻花開
天空霜月千山曉
秋引松風萬壑哀
曉起凭欄瞻望處
彩雲丹樹已成堆

新鄉道中

伏城風雨襍煙冥野店柴關半不扃五月地橫千里赤
十年官負一袍青帝京草木沾周澤人海英雄泛楚萍
唾手功名今偃蹇幾因塵土鬢毛星

保定道中雨晴

柳塘春水泛鳴蛙咫尺雲山近帝家綠野桑麻新雨露
春城絃管舊煙花今諳卓茂循良傳人逐張蹇使者槎
遠道夕陽歸去晚隔林啼鳥送征車

雲山煙水圖

樓閣隱煙迷野望楓林落木動秋容水通雲竇傾寒玉
山入潭心倒碧峰彭澤柳庄風雨暗嚴灘釣石蘚苔封
長楊五柞春光好應讓雲山第一重

織錦迴文圖

玉關人遠戍煙迷別思驚心寄錦題合浦月明珠蚌淚
洛陽春曉綺鶯啼書憑白雁牽愁迥夢遠黃雲入塞低
獨喜孟光偕老約百年鼓瑟賦荆藜

蒲圻道中

湘江風露引征車入岫穿林翫物華山水禁寬無貢賦
翠微煙密有人家雨春春稻黃雲熟日照飛泉白練賒
何處一聲樵牧笛飛飛落盡野棠花

劉堯夫憲副陞廣東大參

十年獨守臯陶法今日應分召伯棠五嶺春風鳴翡翠
九溪秋色上桄榔馬援銅柱風聲遠陸賈新書計慮長
莫把天南論絕塞鼎鐘勲業在遐方

送客

時事歷多艱愁心千萬結把袂對斜陽相看不忍別

巴東峽中

去時冰雪深歸來桃李艷短棹羈春愁雲深江路暗

未央餞行

漢業追千載別筵重一遊相看成俯仰寥落滿襟秋

平定道中

十日山行今日盡山風獵獵山雲近解道前途是坦行

一望那知山更峻

獲嘉道中

山城雨過青山曉
楊柳池塘風線裊
帝城北望苦無多
漠漠煙雲丹鳳渺

漁父詞

長江渺渺煙波綠
罷釣漁翁船傍竹
摸魚換酒月明歸
醉倚綸竿春睡熟

初朝

宮柳含煙曉日晴
太平天子御承明
曉鐘閭闔開仙仗

次第班行引鳳鳴

思鄉

屈指光陰春復秋鄉心國思兩牽愁行雲流水無情思
每到花時不上樓

宮詞

長門花發曉鶯啼二月春光滿帝畿不信東風偏著柳
浪教風絮點人衣

和虎谷王先生韻

百年公論分明日幾度人情反覆間獨有空山飛鳥倦
不因風雨解知還

美人寓意

玉人春望隱蒹葭金鳳簪雲髻綰霞薄暮倚欄橫翠袖
東風吹雨惜殘花

巴東峽行

曉泊孤舟春水生遠灘雙棹布帆輕消魂一覺鄉心夢
卧聽四山風雨聲

遠安山行

楓林啼鳥禰村春
曉色征鞍寄遠踪
不盡溪聲寒水碧
四山霜葉幻秋容

宿香籍寺

紫翠煙消石徑斜
半灣茅屋是僧家
禪心不動楚山碧
落盡蕭蕭松荻花

宿香綠寺

索莫秋林煙雨中
楓巖盎盎水淙淙
衡陽雁杳寒雲隔

惆悵半山霜葉紅

宿玉泉寺

宦海塵踪逼歲忙
霜清月冷到僧房
孤燈岑寂山更寂
一榻篆煙秋夜長

東光澤王召飲

霜臺獨夜月明時
邂逅無緣醉酒卮
遙想玉人當此夕
醉吟紅燭困秋思

書紫荊關龍華鋪壁二首

溪雲初起山圍帶寒雨斜飛風絡絲猿鶴不諳塵俗共
驚聞人語上高枝

九天運轉三陽泰一節霜寒萬竈軍烽火不驚春野靜
戍樓空照夕陽暝

湖上詞

雞鳴茅店曙煙高望望鄉關別思勞夢合乍驚蝴蝶散
一江風雨撼驚濤

九谿詠

排闥空山鎖寂寥
壁燈明滅際春宵
夢魂忘却松聲急
疑是寒江夜半潮

讀廖運同詩有感因以美之

五月尋春春已空
海榴花放醉薰風
曉來霧捲雲鬟綠
一簇香羅萬點紅

天空霜冷塞雲黃
雁陣驚寒字兩行
幾度參差無覓處
海天愁思正茫茫

陳伯行遠謫

西風落葉滿秋林酒盡驪駒別思深君遇故人如有問
謂予猶抱昔年心

和塞上曲

秋風塞馬遁沙田劍倚空同半壁天兵衛森嚴春幕曉
滿庭珠履客三千

又

邊官誰復解邊籌萬里關梁重國憂惟有黃河如故國
年年常遶壑山流

石倉歷代詩選卷四百七十四

欽定四庫全書

石倉歷代詩選卷四百七十五

明 曹學佺 編

明詩次集一百九

陳洪謨

宿興隆有感次韻

行行夜郎界冉冉夏初時
家山念非遠斗杓已屢移
所苦道路險步履凌巖戲
草淫與溪瘴睇望迷津涯
單車

日南指奔馬倏西馳悲加隱新調塵夢牽遐思野人正
東作殷勤飾鑑基化工愛長養嘉禾貴蕃滋常恐風霾
至良農須自持

去金馬關別二司諸同寅

我來庚辰初萬里動遐思豈不惜薄劣君命胡敢違明
明國常憲奉馭臣之宜矧茲荒服外人心還澆漓賄成
放以寵刑政日紛披我材本樗櫟所志良不卑願言儆
前哲明允人乃依舒慘一以理而敢乘之私苞苴與女

謁赫赫天鑒茲任重道更遠心役神已疲所幸僚案賢
日夕相夾持寡過雖未能勵行真有資脂轄忽東往寧
免負乘譏諸君並才俊矯矯麟鳳姿神堯起唐服萬國
開重離拔茅憶連茹以次升鼎彝祖鞭謬先着臨岐增
忸怩把酒不能別貢言非詖詞明朝渺南北曷負同心
期

撫州舟中

使旌向明發戒舟遵江津豈不愛飛輶念此民力勤天

風若相助片帆無逡巡兩日亦短晷倏踰盱江濱不聞
烝徒苦且遠車馬塵一念豈有濟作則由吾身充類翼
同志吾言非矯情

潯陽留別

新秋雨初歇草木生微涼汎汎鄱湖水相送意更長旬
日已云久對語傾衷腸名山同追尋古洞還趨蹌把酒
不成醉仰眎鴻雁翔霎然浮雲起白日將迴光貞蘭植
空谷歲晚為誰芳相信不在跡千里能無忘

登九江希庾樓

新樓極虛敞竹樹還陰森何意塵囂中有景如山林遠
人欲遠覽小構依孤岑飛甍捲朝霧疎簾含清潯我來
坐移晷泠然風滿襟煩敲已蕩滌杯筯勞重斟江山足
清賞孤興動豪唼昔人盛風致流傳猶及今清談豈足
貴保障應同心名樓義在此良賈真歲深

遊君山值大風

泛泛古城隅中流極凝睇擊楫時奮昂十已六七際風

伯何飄搖陰雲極排翳白日將無光飛沙觸人背濁浪
拋幾尋船敵舵難捩吁嗟湘君祠咫尺不可濟重華去
已遠即此亦云契悠悠百世心瞻望增泗涕事變難預
防對面成乖戾風乎無太勞天道終開霽

赴召荆南道中偶成

通宵雨不歇及晨乃微晴輕陰散天末風細沙堤平揚
旌上官道白露猶縱橫前驅夾弓弩矛戟何光明鼓角
厲音響健馬還嘶鳴趨召靡敢後稽首瞻神京豈不惜

衰朽殊恩難荷承朴忠固有素勉旃惟茲行

宿趙州

曉發內丘縣暮投鄣城館天寒霜滿林路修日云短燈
火已深更虛堂月華滿隱几欲無言小酌銀缸淺豈不
惜衰頽君命義難緩明朝又樂城應鐘月初漸

真定值雪有感

孟冬纔初旬飛雪遽如是微聞夜窗鳴及晨忽盈砌古
樹垂寒枝亞亞瓊瑤綴煙靄如雲屯咫尺迷城市須臾

風怒號入面勁如刺僕夫聲嗷嗷茲惟凶荒歲枵腹已
連朝鶉衣近復敝溝壑死不免凍餒何足計吾聞心惻
然此地人多累南方當時和煦如春氣辛勤事耰鋤
衣食亦不匱雖遇水旱年倉庾猶有備今我過諸州亦
聞發賑濟貧者未霑粟富者已盈筭從來救荒難十百
纔一二勗哉諸有司輯寧尚加意

望君山和二山中丞韻

櫂歌動雲表波光盪斜陽一碧餘萬頃心目共徜徉浮

萍露水面遠睇紫寸腸叢林集重翳蘭止揚餘芳路疑
蓬島隔地引銀河長古祠委丘莽瓣香無由將翠華去
不返涕痕留疎簷此念貫今古麟囿兼鳳岡亨嘉本難
再人事多鴟張睠言憂樂懷哲士空自傷春深樹影合
綠葉繁枕柳臨風更興歎浮世非真念

白帝城

灩澦堆下白浪走舟師膽落蛟龍吼赤甲山高雲接天
蒼崖翠壁排重關地形似此真奇絕按壘猶聞路人說

虎視中原力有餘，恃險欺天計非得。
君不見左孟門，右太行，周師躍馬如康莊。
東函谷，西漢中，楚人一炬三月紅。
從來地形不足數，西京大業起農畝。
區區莫訝子陽蛙，猶勝王郎作威斗。

東湖書院為都憲吳公作次東塘侍御韻

大雲山色繞晴湖，湖邊掩映皆楸梧。
便從此地構精舍，回首湘山非故吾。
胸襟浩蕩湖亭小，萬卷圖書讀來少。
下探瀛洛上勛華，墜緒茫茫尋未了。
廟堂事業本優為。

寒谷須勞衍律吹從來學道貴無善聖代伊周今復誰
黃鶴樓次西涯閣老韻簡中丞秦公

細雨江城秋澹泊一樽何處堪携鶴選勝重來近十年
虛樓視昔還恢廓兩山矗立誰疏鑿萬壑驚趨猶脉絡
壯勢平吞白帝城寒光遠帶湘妃閣雕甍繡閣俯蒼峰
水波搖洩芙蓉宮幾家絃管處居密千里舟航貢道通
鐵笛聲孤時對月蒲帆影亂晚隨風迎門花鼓來僊客
入畫青蓑羨釣翁把袂同遊皆國彥錦席高張叨我半

凭欄觸景各抽毫
搗詞誰復過王翰
楮間高扁少師章
海若天吳駭吾見
中丞更續郢中歌
玉笋瓊杯照人面
况說綏懷動隱憂
民情吏治精而練
二公聲望將無同
屹屹斯樓並霄漢

宿金山寺

金山突兀江心起
上無依附下無底
遠觀疑若一萍浮
近看還將三島擬
我無南楚夙傾心
茲來喜值天宇清
淨練平鋪去航穩
霎時樓閣開雙睛
衲子持香導吾上

水石蒼茫鏡中像纔臨崑洞覺窈深復到禪堂愛軒朗
坐來風日更恬熙共摘山花勸酒卮中冷泉甘我自酌
萬斛塵土蠲無遺轉頭忽見陰雲布共出寺門覓歸路
白浪乘風勢蹴天青黿挾雨聲如怒舟人艤岝不敢撐
瞬息上下俱沈冥我亦退歸寺中宿復聽山僧夜講經
因思一日陰晴異咫尺甕城如夢寐楚中亦有岳陽樓
後樂先憂記應是

賀聞山先生生旦用韻

華堂錦瑟傳纖手簷鵲飛雙鶴鳴九玉壺滿泛長生酒
持來再拜為公壽頌比岡陵隨衆口况添葭莩復年友
嚆飲何妨杯似斗金盤縷切冰絲藕君家本是文章藪
棣萼荆花照軒牖鵬運海力能負龍馬行空聲正吼
遐齡擬出彭喬右維嶽降神生豈偶商巖霖雨還屬某
渭水熊羆兆非後我醉放歌日已酉濃墨大書愧如帚
哄堂一笑兒童走黃鐘之側鳴瓦缶乘興更欲開餘韻

戲答禽語

秦晉山中有鳥鳴曰得過且過遇深冬毛羽落則
云云至春又鳴曰鳳凰不如我俗名寒號蟲

得過且過朔風吹巢巢欲破幸爾一枝尚未墮啄有殘
黍亦不餓霎時春景融毛羽無點流千仞光輝還只那
人生富貴皆儻來百歲康強能幾箇得也過不得也過
楚蜀春間有鳥鳴曰甜也喫苦也喫苦也喫盖反舌類也

甜也喫苦也喫有鳥飛鳴胡棘棘世情冷煖爾所知口
腹至微何足惜餓采西山薇醉飽墻間食九鼎鴻毛須

自擇甜也得苦也得

梁燕二首

紫燕重來日青春欲半時泥融巢未葺風細語還遲豈
戀華軒穩應懷故主知風心異蜂蝶冷煖逐花枝

對語音還滑幽飛態自生樓簷營壘易舞席落花輕皎
月莊姜恨迴風漢后情等閑春意滿哺子已雙成

善卷古壇

枉山稱福地郡乘託高名無意居宸極何心來楚荆林

深青嶂合壇迥白雲橫民化應成俗今猶少宦情

伏波遺廟

廟祀何年始今惟古壘存疆場功自著風雨晝長昏馬
革還初志明珍珠信浪言如何漢英主猶有絳侯冤

橘洲晚霽

嘉樹何年植秋風萬頃黃寒沙頻弄影落日遠浮光錫
貢珍堪擬侯封富莫強孔明亦貽後負郭只田桑

萊公甘泉

古寺一掬水孤臣萬里心國恩終不負帝赫若為臨勝
地神應秘高風世所欽匪人亦饗酌聲迹自消沈

喜雨次吳貳守韻

好雨朝如注簷聲徹夜同鵲鳩鳴更急蟻子穴猶封物
荷回枯力人誇斲鼻工至誠元易感不在話言中

丁亥除夕

此夕真堪惜相催又一年燒燈聊共坐酌酒向誰先爆
竹聲傳急梅花影對偏詰朝拜正旦舉手贊堯天

春日西郊

河汭闕初啓荷塘路轉幽
春深林樹合雨過野雲流
老眼花搖落吟懷鳥唱酬
夕陽山色好歸騎更淹留

城西三舍地野老百年心
別去時何邁遷來日未深
山川應協吉竹樹漸成陰
登覽當春暮冷然風滿襟

答溟士張愈光春日韻

楚中春已動江館夜還風
才埒凌雲客情兼失馬翁
化工聊戲劇吾道此開通
會展天池翼相看鬢未蓬

復周蓋臣郡博

千里騰驤地重湖暫寄時露桃春未透風柳曉還吹杖
劍明初志開尊話舊私吾鄉近傳勝詩問日相遺

戊子除夕

一年惟此夕相對意茫然飽食還終日豪吟僅數篇人
情經歲改物色向春妍醉裏敲殘局燈花落影偏

答張憲副子魚見懷

春江橫素練霽宇散輕陰軒蓋經行遠衡茅入望深鳴

騶關小隊流水咽孤琴莫訝茶瓜久高談慰我心

次少華提學桃源韻

嚴程聊弭節高興欲窮源秦晉人何在江山迹故存風
聲浮遠嶼月色徧荒村覽勝多奇思搗詞數百言

又

名繇秦代後地俯鼎江偏桃樹還彌望人家自力田茹
芝懷綺老飛笛倣回僊山逕多豺虎愁聞更幾年

荆門卓刀泉廟

千古英雄淚孤亭土木身松蘿蟠歲久蘋藻逐時新杖
策紆天步揮刀仄日輪有泉堪飲馬灝氣貫秋旻

新野道中遇雨

湍陽初遇雨晴霽已經旬每訝秋還熱今看景一新郵
亭風陣急茅舍滴聲頻頗愛吟韉穩渾忘客裏身

葉縣過沙河

沙河一帶水船受兩三人遠道來良賈涓流接上津樹
聲秋淅瀝山色晚嶙峋獨念民生苦年荒賦役頻

渡河

鄭衛河南北風聲百里聞
平成懷禹績郡縣憶秦分
徒馬嘶沙野驚鴻下水濱
皇明聲教廣遠近正同文

定州曉發

晨鐘催曉旆霜落月初沈
古陌輪蹄續人家煙樹深
皇恩真曠蕩老病日侵尋
獨喜天澄霽猶堪試短吟

聞蟬

此聲頻入耳相對又斜曛
露宿渾無累深歲尉有文危

枝愁積雨逸響過行雲百鳥誰同調羈懷莫可聞

見螢火

幾點疎窗度相看爛有輝分應忘草化意故向人飛隱
約緣階砌分明振羽衣煩敲更難寐紈扇為停揮

過新興公館

宦遊三十載此地鮮經行野渡秋波渺禪堂夜雨聲茲
聞公館建人喜路歧平為政須知體前賢論說明

贈思州王推官澤

貴竹人稱遠思州路更偏編氓夷語雜封域楚山連土
物丹砂貴公庭綠草妍漳南素門閥愷悌有心傳

重到新亭用前韻

已辦扃扉卧今成出郭行雲移江樹影風帶野泉聲對
景跨竒絕逢人說治平淹留還日暮歸騎月華明

和答二山中丞見懷

江城初按節草閣此回春開甕何妨暮論心欲向晨雲
鴻聲振厲沙鳥性沈淪醉裏敲詩案山靈笑濫巾

又

卧病衡茅下欣聞使節來一番春雨潤千里瘴雲開憂
國勤封事安民惜露臺河中應借寇徵詔莫頻催

元旦早朝

金門初闢鼓聲嚴紫殿高懸翠羽簾天宇正清還向曙
龍顏有喜此遙瞻循環歲籥三陽啟汪濊恩波萬國沾
朝罷羣公多笑語豐年兆慶已先占

元夕觀料絲燈

料絲滇出以金齒者勝詢之土人云以瑪瑙紫石
英諸藥品搗為屑煮腐如粉然必市北方天花菜
點之方凝即縑為絲織如絹狀上繪山水人物諸
色極晶瑩可愛流傳京師價亦珍貴以煮料成絲
為之故名料絲西涯閣老以為繚絲蓋傳者之誤
耳

樣出滇南迥不同分明天巧屬良工并刀細剪吳江碧
宮錦新呈蜀地紅半席分光叨我近清宵真會幾家通

徒聞海外多奇購誰識侯門獨擅功

過朱僊鎮謁武穆王廟

岳駐朱僊力抗金指陳恢復見胸襟却憐十二金牌詔
盡失三千甲士心道濟長城人與敵孔明遺像古垂今
東風下馬來瞻拜滿樹啼鳥正夕陰

長沙道中

山路縈迴草樹稠午風輕度鳥聲幽禾苗盡秀初逢雨
衫葛微涼早報秋旅店曲隨流水轉戍樓高傍暮雲浮

更聞此地民淳朴女織男耕夜不休

又

幾年鄉郡說潭州旌節今來亦壯遊青嶂近收衡岳雨
滄波遙接洞庭秋誰家簾幙朱垂地到處菑畲綠滿疇
幸是聖明文化久夜深閭巷有歌謳

謁龍陽尉青公祠

青公名紋盛蜀人洪武任龍陽典史時邑民負租
三萬餘石青詣闕請見章三上不報遂自經于登

聞鼓下特命官覈實詔免之仍以一萬三千為額
民至于今思之因祠祀焉

江鄉誰構此堂新香火春秋薦藻蘋當日孤忠陳大義
百年殘喘沐深仁史籍既死尸猶諫東野雖貧業不淪
宦轍底今多厚祿幾人行政為疲民

大祥後述哀答陳文鳴提學

萬苦縈心不可論又看秋色滿郊原孤雲逝水歸何處
落月啼鳥正繞門養之旨甘空往恨教存忠孝是深恩

因思昔日門墻下道義能令士習敦

二

過我頻將道義論
可堪斜日映秋原
茶爐火斷空淹坐
松逕風回欲掩門
淚盡尚慚詩句意
情深何止故交恩
歐公鄉里廬陵是
吾省文風已復敦

過古樓公館

公館依然據古村
肩輿再至豈辭煩
門前霜葉饒丹色
階下寒蕪退綠痕
隨處稻粱秋大熟
幾家燈火夜初昏

勞勞塵鞅渾無定回首湘江有夢魂

謁文丞相祠

青螺山下相公亭瞻拜遺容仰德馨百代衣冠知守死
一方山水自鍾靈夷齊重義輕周粟李衛貪生拜虜庭
讀罷碑陰懷往事夕陽回首涕如零

秋日永寧是縣僻守巡罕有到者

草樹縈迴石磴盤仰窺巖穴俯驚湍坤維自設西江險
人世虛傳蜀道難滿野黃雲秋正熟連溪翠葆雨初殘

地窮車馬從來少應笑旄倪夾道看

江城別意送李愈憲

南浦春光入櫂歌綠楊風軟水生波可知尊酒徘徊處
無奈萍蹤聚散何彈鋏馮驩心自壯投機曾母事應訛
百年忠孝男兒志報稱還看鬢未皤

南安道中

百里嚴程兩日間挽舟驅馬亦艱關數聲鳥過雨初歇
幾片花飛春欲還地勢自分江右界嵐光猶識廣中山

因憐蹤跡天涯遍大道何曾見一斑

過桃川宮

桃源奇跡古今傳此日來尋草莽間地產桑麻仍舊俗
路通車馬自空山苔封小洞門三尺花落前溪水一灣
便欲臨風學仙侶丹霄誰見鶴飛還

馬底驛夜坐

峰巒高處驛亭斜矮屋寒煙有幾家出壑松風聲淅瀝
入窗梅月影交加僕夫笑語爭分火候吏殷勤次進茶

獨坐清宵鄉思渺更依北斗望京華

苦雨復郡守韻

冥濛雨意浩無邊望望江門水拍天去馬來牛那辨色
滄波白浪競趨田愁聞市桂虛朝爨更說移床廢夜眠
獨喜郡侯能露禱口碑盈路已先傳

又

碎竹聲繁到枕邊薄寒真是積陰天窮鄉豈有闕

孤官兼無負郭田冷煖世情隨處是蕭條門巷對愁眠

功成補漏誰堪托煉石從來亦浪傳

哭中丞孫公德成

彭蠡腥風六月寒孤臣無地挽狂瀾
氣吞僭竊詞應激身繫網常死亦安
必反祿山曾有疏無庸叔段孰為端
淒涼廣潤門前路老稚吞聲血未乾

過桃川次丙子冬韻

塵踪何處探仙源晚共漁翁得細論
滿地野花桃樹少半山煙雨洞陰繁
輪蹄影絡東西路雞犬聲聞遠近村

更願年登薄徵賦人人溫飽即君恩

二

俗慮暫拋塵鞅外閒情聊寄翠微間有無仙跡在何處
今古人家住此山水咽笙簧歸石洞雲連屏障倚江灣
花飛片片隨遊躅莫怪豪吟帶月還

山塘道中用韻

碧樹蒼厓入逕斜隔溪煙火有人家山村日暝行猶遠
花塢春深興轉加野史引泉頻灌藥園丁燒笋慣供茶

驅馳不盡憂時恨卻笑年來兩鬢華

鎮遠行院有懷

三楚山川此地窮夜郎西望古南中百年治教衣冠變
萬國梯航道里通芳草郊垆春意藹古槐庭院午陰叢
江天渺渺風煙靜推廓應懷范老功

渡崇安江奉懷黃山都憲公

兵火頻年已可憐今來江潯有漁船窮猿遠度藤蘿月
小犢深耕桑柘煙喜聽虞廷初振旅猶聞范老舊籌邊

幾回虎帳論心處坐我春風玉樹前

出宣威關用黃方伯韻

貴嶺猿聲已熟聞兩藩南界此中分
驪駒尚憶滇南路旌旆遙瞻薊北雲
豈有才華清徼服更將衰朽負明君
風簷次述非能事淺薄真慚論蜀文

新添道中用壁間韻

萬木山深聽鳥啼兩行旌旆路東西
鶯花影亂青春老象緯光垂碧漢低
萬里驚風塵滿目連朝急雨水平堤

卷四 七十五
耒耜莫訝農夫苦一枕桑陰稱午栖

無題用前韻

風回候嶺鶯歌巧雨斷巫峰蝶夢迷
篋裏春衫香未試袖中秋扇敞猶携
塵根漫爾思騎鶴念蒂憑誰學佩犀
獨倚畫欄摘新蕊却憐珠露滿朝畦

閒適

繞簷晴鵲已朝曦夢到無懷自起遲
白黍每甘關味足黃花偏喜晚秋宜
心能悟聖非耽酒業鮮忘機不著棋

欲抱冰絃傍流水恐煩餘思入詩脾

宿白鹿洞

五老峰高世所聞洞名白鹿枕江濱山靈永護諸賢迹
石室珍藏百代文風靜旌旗閒虎豹春回草木藹煙雲
幾年仰止懷應切偶遂登臨又夕曛

進賢道中

樓船十月下湖東此日西還歲已窮山館地寒霜在望
草橋冰滑雪初融無端世路經行徧有約山靈夢寐通

獨喜馳驅身尚健不妨題詠采民風

巡臨江之瑞州

鼓角聲嚴曙色遲滿天霜露拂旌旗松筠閱歲孤忠在
蒲柳先秋兩鬢知俗喜蝸爭緣地薄人多菜色為年飢
敷揚帝澤全無術遠道隆寒豈足辭

東鄉道中

兵戈猶憶十年前此日東鄉路不偏車馬終朝聞振策
間閭隨處盡炊煙千山木落深冬景古戍鴉啼積雪天

遠涉豈堪辭鞅掌
寶書珍重要敷宣

城峽江新縣口占

地遠山深憶昔年
潢池赤子亦堪憐
聖明洞徹貽謀遠
父老歡欣向化便
江面縈迴雙澗引
天邊拱揖數峰連
微臣體國思經野
此議元成岳牧前

遊赤壁赴鄧侍御文瑞約

千里滄波接素秋
偏從笏史得重遊
風流詞客今何在
霄漢陰雲此尚浮
不斷藤蘿緣古樹
無心鷗鳥下中州

銜杯莫厭青山暮燈火相看興轉幽

初度發夏口

今朝五十四生辰久滯浮名此遂真黃鶴樓頭猶是夢
桃花溪上未全貧微涓那補滄溟濶大造能容老病身
鼓楫中流還自適菊香飛入酒觥新

登岳陽樓

此樓飛構自何年作鎮南州勢不偏日暮巴陵雲滿地
春深夢澤水連天登臨自古懷興替憂樂憑誰問後先

短棹秋風聊佇望幾行征雁正孤翩

遊君山

君山四面皆湖水遙望巴陵十里餘渺渺煙波無客到
陰陰石洞有僧居風清氣朗秋分後虎嘯猿啼月上初
獨有含顰無限意幾莖斑竹尚扶疎

清明上塚阻雨

佳辰苦被風和雨策馬前村不可行十載親容還夢寐
百年人世幾清明江鄉歲歉猶艱食農畝春遲未力耕

更有垂楊裊煙霧柔條萬縷似愁縈

和陸僉憲舉之春日武當宮

陽回大地春光滿路入丹臺眼界寬
千里湖山初弭節百年心迹一凭欄
雲開石殿星辰迥雨過江門草樹寒
莫訝登臨詩筆健清才元是禁林官

草亭同周郡博張愈光觀海棠

去歲看花花又謝風神長憶一年餘
今朝氣暖開還早萬縷絲垂色亦如
猩染絳袞春睡後暈生丹臉酒腥初

臨流顧影須觴咏莫遣佳人歎索居

二

靈根海上移來遠艷質還分定惠餘紫縷低垂春正綰
清流頻照影誰如紅生笑頰深杯後粉綴啼痕曉夢初
獨有心知遠遊客幾回題句向茅居

三

無端景色名花在一種芳心萬縷餘獨立東風神恍若
不禁風雨淚紛如睡魂尚怯開筵處笑靨微生覽鏡初

豈為閒情縱詩興要扳春意滿林居

四

書屋忽驚春雨驟名花真怯曉寒餘身隨流水魂應斷
帶綰東風力不如麗色總非歌舞日啼痕還憶別離初
春光一瞥仙踪渺欲向蓬萊更卜居

送車通判守隨州

佐郡吾鄉說老成催科撫字喜無行官遷藩刺新承寵
地列春秋舊著名舜井尚聞光燭漢隨珠何羨價連城

憑君卧治攄成績漢傳循良此繼聲

大龍留別用壁間韻

覽鏡頻看兩鬢蓬山雲舒卷此浮踪
禪機已解忘沙鳥襪線那堪補袞龍
情劇西堂懸夜榻夢隨雙闕聽晨鐘
翩翩白雁秋光渺又見前山紫翠重

九日道中

今朝重九天開霽萬里江山屬勝遊
因憶舊年人客至欣看小圃菊花秋
冰霜晚節心應契君父深恩分未酌

獨上高岡頻振袂清時不數晉風流

荆南行館夜坐

荆南名郡古稱雄經緯功存禹貢中千里帆檣吳蜀會
萬家樓閣水雲通兵籌未試時方靖米價初平歲亦豐
獨坐行臺清不寐雁聲拖雨掠層空

別九峰司徒孫公

白雲長卧九峰深忽報城居此過臨千里登堂還展拜
十年為別自驚心情濃鄉曲杯頻勸天假精神病不侵

宵旰祗今勞夢卜商巖須仗早為霖

博望驛登小亭次韻

驛舍何年構此亭登高小坐有餘清
風翻翠竹來淇上雲繞前峰憶洛城
瘴海羽書隨雁過晨門簫鼓放人行
民窮尚說頻年旱田里蕭條久廢耕

葉縣道中

春秋此地楚疆場經畫何年入豫方
地有古祠稱葉令人懷遺德說周王
路當衝要官還好民苦征繇歲屢荒

獨荷皇威今遠被風颭千里絕飛揚

固節驛曉發

良鄉稽首望京朝五色雲中日正高聖代輿圖過漢晉
小臣踪跡本蓬蒿重瞳天表還親覲司馬台階實濫叨
羽蓋復聯今二紀不堪霜鬢影蕭騷

辛卯中秋張灣對月

去歲清光千里共今年風物幾人殊金波泛影隨時興
夜色生寒積閨餘野泊漸看閭闔遠舟行真與水雲俱

生平貞素猶堪信
皓魄依依正照予

重陽過濟水

一葦蕭然夕照間
淺流還苦路行艱
幾番風雨重陽節
數點人家柳樹灣
野菊有香頻寄目
杯樽無酒也開顏
餘情待續登高賦
已愧才疎力更慳

望太白樓

是樓不登二十載
此日相過重黯然
落木無端秋色老
碧天如洗月輪偏
奇才尚憶昭陽曲
佞舌誰憐貝錦篇

莫倚回欄歌往事浮雲流水自年年

立春後一日元夕值雪

昨日春盤初送菜今朝花鼓又張燈
天時人事每如此斟酒賦詩還未曾
雪下正當和氣會梅開偏喜暗香凝
瞳矐月夕猶堪畫却憶山陰舫可乘

送高節推弘望北上

場屋當年識俊才吾邦司理固宜哉
庭封尺牘民應朴器別盤根刃自恢
芝誥一函來闕下蒲帆千尺倚江隈

從來臺諫須時彥况值敷言路正開

黃鶴樓次韻

幾年不到層樓上此日重修喜落成
細雨城中車馬跡夕陽江上櫂歌聲
晴川芳草詩應好玉笛梅花興獨清
一目乾坤萬餘里開筵寧厭酒重行

聞報書懷

賜閒林壑幾年餘衰病真便化日舒世事已拚成
醉夢薦章那復及慵踈推賢諫省心應赤竊吹江皋道不如

况說重華隆盛治，夔龍聲迹總堪書。

冬日郊行

歲熟初收萬頃黃，郊行隨處說時康。
白雲天際微含凍，丹葉林梢早著霜。
野眺尚違心上景，公輸誰念眼前瘡。
相逢林叟談終夕，野藪村醪自不妨。

寄意

抱瑟花陰下，朱絃玉指纖。
東風彈不就，明月下前簷。

聞鵲

有鳥聲悲切初聞涕可揮似諳行路險故喚不如歸

羣兒春嬉圖

暖風軟繡帽霽色稱華裾拾翠郊原徧欣然共小車

挽曾紀善

執簡王庭歲月深壯心無奈二毛侵悠悠蜀道千年恨
莫把哀辭作楚吟

過楊老哨有感

春水溶溶綠滿灣征夫荷鋤有餘閑承平已喜兵戈靜

猶憶前年夜破關

西園雜題

藥畦花徑此重開
屐齒微沾旋掃苔
滿地清陰天若假
杖藜寧厭去還來

擾擾城居地獨偏
草廬虛敞稱高眠
一篙春雨池塘潤
旋理綸針向釣船

垂絲海棠

海外仙株自不凡
柔枝嫩蕊渥如丹
東風睡足渾無力

猶帶餘醺倚畫欄

池亭

東風吹雨小池平
隱隱荷錢日漸生
試問荷開還幾日
西隣釀酒味初成

紅梅

玉質天然不受粧
舞筵聊爾試霓裳
由來國色多殊調
自有臨風一段香

讀明妃傳

紫臺春少類啼紅豺虎窺鸞類豈同莫把哀絃咎圖史
由來失策在和戎

草堂石山

幾年移得碧雲根幻出壺天景象新
盆沼更看波漲綠細蒲芳草一般春

石倉歷代詩選卷四百七十五